

JAKOBO

Jakobom dis tcgāya sa

Téé-cookg'ai sa

Jakobom dis tcgāya sa gúù zi kúrú ta ko kg'òèa ta q'oo koe zi di x'àèan úúa hāa. Tcgāyas Jakobom dis ka tsi kò xòmse kg'ui kg'oana ne tsi gha máá: “Ncèè dtcòm tsi kòo ne méé tsi gataga thēé ēe tsi dtcòmā hāa sa kúrú. Kg'uiān hēé naka tséān hēéthēé méé i qōda mááku. Tsaris dtcòm sa méés tsari kg'òèan q'oo koe tséé. Tsaris dtcòm sa méés tsari zi tséé-kg'ám zi koe x'áise.”

Tāáka zi gúù zi kam ko kg'ui: qguù sa hēé naka dxàù sa hēé, kúrúá bódoku sa hēé, qāè tchàno-tchanokuan hēé, tāákase khòè ne qgóó sa hēé, naka tām di tséé-kg'ámān hēé, q'āa di tc'ēean hēé, mēékuan hēé, dqòmsean hēé naka cg'aré-cg'aresean hēé, c'ēe ne bóó a nxàe sa hēé, qáo tcáoān hēé, naka còrèan hēéthēé e.

Qaa-qaasa kg'uiā ne:

- q'āa di tc'ēea ne
- dtcòm sa hēé naka tséé zi hēéthēé e

Tcgāyas q'oo koe hàna zi:

- Dtcòm sa hēé naka q'āa di tc'ēean hēéthēé e (1:2-8)
- Dxàù sa hēé naka qguù sa hēéthēé e (1:9-11)
- Kúrúá bódokuan hēé naka qāe-qaekuan hēéthēé e (1:12-18)
- Kóm sa hēé naka kúrú sa hēéthēé e (1:19-27)
- Táá méé ta tāákase khòèan qgóó guu (2:1-13)
- Dtcòm sa hēé naka tséé zi hēéthēé e (2:14-26)
- Dtcòm-kg'ao ba hēé naka tām ba hēéthēé e (3:1-18)
- Dtcòm-kg'ao ba hēé naka nqóó ba hēéthēé e (4:1-5:6)
- Tāáka zi x'áè-kg'am zi (5:7-20)

Dtcòm sa hěé naka q'ăa di tc'ěean hěéthěé e (1:2-8)

1 ¹Tsgámkagu tu ur ko, tíí Jakobo ra, qāār Nqarim di ra, a X'aigam Jeso Krestem di ra, nxāa ra ko 12 zi qhàò zi, ncēm nqōóm koe tsai-tsaisea hāa zi *ncēes tcgāya sa* góá máá.

²Tíí qōe ga tuè, ndaka x'aè ga igaba tu ko tāaka zi kúrúa bóòku zi cgoa xg'ae igaba méé tu kaisase qāè-tcaoa máá zi. ³Q'ana tu hāa, gatu di dtcòmān di kúrúa bóòkua ne ko qarika-téékagu tu u sa ke. ⁴Igaba méé i **gatu di** qarika téean tchānos tséé sa kúrú, naka tu gha nxāasega wèé za ga tchāno ii, naka kāān chibi ii, naka tua gha c'ěe gúú kaga táá tcàòè guu.

⁵A ncèè gatu ka c'ěem kòo tc'ěean tcào ne méém Nqarim ncèe ko qāè-tcáoase hěé naka cgómaase hěéthěé wèém khòè ba máà ba dtcàrà, nxāaskam gha máàè e ke. ⁶Igaba méém dtcòmān úúa hāase dtcàrà, kái tc'ěe tamase, gaam ēem kái tc'ěe ba tshāan di qhonēan khama ii ke, ncèe ko tc'āān ka xàbùè, a ko kabi-kabise e, ⁷⁻⁸ēem khòèm kái zi gúú zi ko tc'ěe ba kana gam di zi dàò zi koe kgòe tama ba méém táá tc'ěea máá, cúí gúú gam gha X'aigam **Nqarim** koe hòò, ta tc'ěea guu khama.

Dxàu sa hěé naka qguù sa hěéthěé e (1:9-11)

⁹Dtcòm-kg'aom ēe nqāaka hàna ba méém dqòmse, tc'amaka hànas téé-q'oos *ēe Nqarim máà mea hāas* domka. ¹⁰Gataga méém qguùam khòè ba Nqarim cookg'ai koem nqāaka hàna sa q'ăa, dcāan di x'aan khamam gha ma kaà ke. ¹¹Cám sa ko kùruan cgoa qaò, a sa a dcāan nqaikagu, i gaan di x'aan tcheè, i gaan di t'òèan kaà khama. Gatagam gha ma qguùam khòè ba ma kaà gam di tsééan koe hāa a.

Kúrúa bóòkuan hěé naka qàe-qaequan hěéthěé e (1:12-18)

¹²Ts'ee-ts'eekg'aièa baa, khòèm ēe ko kúrúa bóòkuan koe qarika téé ba. Ncèè kúrúa bóòkua nem kò tàāa hāa nem gha cábás kg'òèan di sa cábákaguè khama, ncèe Nqarim ēe ncām Mea hāa ne nqòòkagua hāa sa. ¹³Khòèm ēe ko kúrúa bóòè a ko chibian koe tcāàè ba méém táá máá: “Nqari ba ko chibian koe tcāà te,” témé guu. Nqari ba cuiskaga cg'āèan ka chibian koe tcāàè tite, a ba a gataga Gabá cuiskaga khòèan chibian koe tcana hāa tite ke. ¹⁴Igaba i ko khòèan ncèeta iim dàòm ka chibian koe tcāàè: khòè ba ko gam tc'áró-tc'aro di tc'ěean ka cg'āèan koe tcééa úúé, a síí ntcóm̄s koe qaè. ¹⁵I ko nxāaska gam di cg'āè tc'ěean ēe i kòo càuse ne chibian xām, ne i ko chibian ēe kai, a x'ooan óá.

¹⁶Táá méé tu qàe-qaeè guu, tíí qōe ga tu ncām-ncamsa tuè. ¹⁷Wèés kamas cgáé sa hěé, naka wèés abas tchāno sa hěéthěé sara tc'amaka

guua, a ko x̄a Xòòm x'áàn dim koe guu a, nc̄e Gam koe i cúí gúù k̄abièa ga káà a ba, kana sóman khama k̄abi-k̄abise tama ba. ¹⁸ Gam di tc'ëan koem kò ábà ta a, kg'uim tseeguan dim koe guu a, nx̄aasega ta gha **Gam di ta khòè ta tc'àà di ta ii** ka, Gam ka kúrúèa zi gúù zi koe, tc'àà di tc'òoan xháràm di khama.

Kóm sa h̄éé naka kúrú sa h̄ééth̄éé e (1:19-27)

¹⁹ Q'áa méé tu nc̄e sa, tíí q̄õe ga tu ncàm-ncamsa tuè. Wèém khòè ba méém qh̄áé ii komsanan koe, naka kg'uian koe ão ii, naka ba ão ii xgòàn koe. ²⁰ Khòèm di xgòà ne Nqarim ko tc'ëe tchànoan koe síí tama khama. ²¹ Gaa domka méé tu cg'ãè gúùan kúrúan h̄éé naka cg'ãèan kaikaguan h̄ééth̄éé chòokagu, naka cg'áré-cg'arese naka **Nqarim dim** kg'uim gatu koe xháràèa ba hòða mááse, nc̄e kgoara tu um gha di qarian úúa ba.

²² **Nqarim dim** kg'ui ba ko komsana tu méé tu ii. Kg'ui ba kóm̄s cúí sa tu kò kúrú, ne tu gha ko qàè-qaese. ²³ Khòèm kò **Nqarim dim** kg'uim dim kóm̄-kg'ao ba ii, a ba a kúrú-kg'ao ba ii tama nem nc̄eeta iim khòèm khama ii khama: nc̄e ko ábà cgoaèa bas kg'ái sa bód̄-kg'áís koe bód̄ ba. ²⁴ Ntcàasem ko xg'ara a qòð, a ba a kúúga c'urù ntam kò ii sa khama. ²⁵ Igaba gaam èe ko tchàno x'áèan koe bód̄ ba, x'áèan nc̄e kgoara tu u ko o, a ba a ko qgóóa qari i ba, nx̄aa ba gha gam di kúrúan koe ts'ee-ts'ee'kg'aiè, nc̄e **x'áèan** c'urù tamam kóm̄-kg'ao ba, igaba kúrú-kg'ao ii ba.

²⁶ A nc̄e khòèm kò bód̄, dtcòm̄a nem úúa sa ne, igabam ko gam dim tam ba qgóó tama, a ko tcáóa ba qàè-qaè, ne i gam di dtcòm̄an cg'ãa-cg'ana di i. ²⁷ Dtcòm̄s nc̄e Nqarim gatá ka Xòòm cookg'ai koe q'ano a chibi úú tama sa nc̄e si i: khàadoma cóán h̄éé naka dx̄aè-ntcòan h̄ééth̄éé gaan di xh̄áéan koe kòre si i, naka nqòóm koe káà cg'urise qgóóse sa h̄ééth̄éé e.

Táá méé ta khòè ne t̄áákase qgóó guu (2:1-13)

2 ¹ Tíí q̄õe ga tuè, gatá dim x'áàkom X'aigam Jeso Krestem koe tu kò dtcòm̄an úúa h̄aa, ne méé tu táá t̄áákase khòèan qgóó guu, ² C'èedaokam kòo gautan di tcàà tshàuan h̄éé naka t'òè qgáían h̄ééth̄éé hanam khòè ba gatu dim còrè-nquum koe tcàà, me gataga dx̄auam khòèm cg'ãa-cg'ana qgáían h̄ana ba th̄éé hàà cgae tu u, ³ tu kò èe t'òè qgáían h̄ana ba qàèse qgóó, a bìrí me a máá: “Nc̄e qgáían qàè koe ntcóó,” t̄émé, a tu a èe cg'ãa-cg'anasea ba bìrí a máá: “Tsáá méé tsi èe koe t̄éé,” t̄émé, kana máá “Nqàrè-kg'ama te koe góm̄ankg'ai koe ntcóó,” t̄émé. ⁴ Eèta tu kò h̄éé ne tu q'aa-q'aasean xg'aekua tu koe úúa, a tu a nc̄eska cg'ãè tc'èem xgàra-kg'ao ba kúrú h̄aa!

⁵ Komsana tu, tíí q̄õe ga tu ncàm-ncamsa tuè. A Nqari ba gáé nqòómkg'ai koe dx̄aua ne khòè ne nxárá tcg'òó h̄aa tama, dtcòm̄an

koe ne gha qguù ka, a ne a gha x'aiian di ne q'òò-kg'ao ne ii, ncëem kò ãe ncàm Mea ne nqòòkagua hãa a? ⁶Igaba tu ko dxàua ne khòè ne sau-cgaekagu. A qguùna ne tama ne gáé ãe ko nqãaka úú tu u ne, gane tama nea ncëe ko qáé-nquuan koe úú tu u ne? ⁷A gane tama nea ncëe ko t'òès cg'òès **Krestem di** sa cg'ãèkagu ne, ncëe gatu koe kò **ãe tu ko tcguuè-tcguuè x'aè ka** tciie sa?

⁸A ncëe tseegukaga tu kò **Nqarim di** x'aiian di x'àean qgóóa qaria hãa ne, ncëes ko **Nqarim dis** Tcgãya sa mée khama, a ko máá: “Tsáá ka c'ëe ba mée tsi ncàm, ãe tsi ma ncàmsea khamaga ma,” témé, ne tu ko qãese hëé. ⁹Igaba tu kò khòè ne tãákase qgóó ne tu ko chìbian kúrú, a tu a gha x'àean ka bódè, chibi kúrú-kg'ao tu iise. ¹⁰Dìim wèem ãe ko wèe x'àean qgóóa qari, igaba ko cúis qgáis koe tsaa a ba wèean koe ga chibiga me e khama. ¹¹Gaam ãe ko máá: “Táá cg'áràn kúrú guu,” témé ba ko gaicara máá: “Táá cg'òo guu,” témé khama. A ncëe cg'áràn tsi kò kúrú tama ne, igaba tsi kò cg'òo, ne tsi x'àean koe chibi kúrú-kg'ao tsi i.

¹²Dùús wèes ãe tu ko kg'tui a ko kúrús ka mée tu **tc'ëe-tc'ëese**, ncëe gha kgoara tu um x'àè-kg'ám ka tu gha xgàraè sa. ¹³Nqarim kò hàà ko khòè ne di zi tséé zi bódè q'oo, qàè zi i sa kana tshúú zi i sa, nem gaam ãe kò thòò-xama-máákuan úú tamam koe thòò-xama-máákuan x'áíá hãa tite khama. Igaba ãe thòò-xama-máákuan úúa hãam khòè ba chibi bódè tite.

Dtcòmòs tséé tama sa x'óóa hãa (2:14-26)

¹⁴Dùú sa i ko hùì, tíí qòe ga tuè, ncëe khòèm kò ko máá, dtcòmà nem úúa, témé, igabam tséékagu u tama ne? A gam di dtcòmà nea gha kgoara me? ¹⁵C'èedaokam kò tsáá qòe ba kana tsáá qòes igaba qg'aè-cgaea, a tc'òo úú tama tc'òó ne gha a, ¹⁶me gatu ka c'ëe ba gaa khòèan ka máá: “Tòókuan cgoa qòò, hãa tu gha, a tu a gha tsáú ke,” témé, ãe ko cgáé-q'ooa ne koe qaase gúúan máà ne tamase, ne i ko nxāan dùú sa hùì? ¹⁷Gatà iim dàòm ka i dtcòmān x'óóa hãa, ncëe cúise i kò hàna ne, a tsari tsééan cgoa qòò mááku tama ne.

¹⁸Igabagam gha c'ëem khòè ba xòa a máá: “C'ëe khòè nea dtcòmān úúa, i c'ëean tsééan úúa,” témé.

Ra gha nxāaska tèe a máá: “X'áí te, ntamam gha ma c'ëem khòè ba dtcòmān úú, igabam tsééa ba koe x'áí i tama sa. Nxāaskar gha tíí tiri tsééan koe guu a tiri dtcòmān x'áí tsi,” témé.

¹⁹A dtcòm tsi ko Nqari ba cúí Me e sa?

Qãese tsi ko hëé, igabaga **tsi tcàoa**, dxāwa tc'ëean ga ko dtcòm, a ia a q'áðan ka cgùru khama.

²⁰A x'áíè kg'oana tsia, tsáá káà tc'ëe tsi khòè tsi, tséé tama dtcòmā ne káà hùì i sa? ²¹Ntama ba kò ma Abrahamam gatá ka xòò ba Nqarim koe tchàno iise bódè? Gam di tsééan ka a kò ii, ãem kò ko gam ka cóásem

Isaka ba altaram koe úú ka. ²²Bóò tsi ko, dtcòmà ne kòo gam di zi tséé zi cgoa tsééa xg'ae sa, i kò gam di dtcòmàn tséé zi ka cg'oè-cg'oèè. ²³Si kò **Nqarim dis** Tcgāya sa tseegukaguè, ncēeta kòo mée sa: “Abrahama ba kò Nqari ba dtcòm, Me Nqari ba gam di dtcòmàn ka tchànóm iise séè me,” témé. Me kò Nqarim ðim tcárà ba ta ma tcièè. ²⁴Bóò tu ko, khòè ba ko gam di zi tséé zi koe guu a tchànóm iise bóòè, dtcòmàs ka cúí tamase.

²⁵Rahabes cg'árà-k'g'ao sa kò tǎá za guu a ko nqōó ba ntcǎà tsara khòè tsara séè, a sa a tǎám dàòm cgoa ts'ǎakagu tsara a. A ncēeta hēéan ka sa gǎé kò gataga gas di tsééan koe tǎá tchànós iise bóòè?

²⁶Tc'èe ba úú tamam tc'áro ba x'óóa hǎa, i gatà iim dàòm ka dtcòmàn ncēe tsééan úú tama a x'óóa hǎa thée.

Dtcòm-k'g'ao ba hēé naka tǎm ba hēéthéé e (3:1-18)

Tǎm ba xгаа-xгаа ne

3 ¹Tǎá mée tu wèéa tu ga xгаа-xгаа-k'g'aoan kúú guu, tíí qōe ga tuè. Q'ana tu hǎa, sita ncēe ko xгаа-xгаа ta ko hàà kaisase thòòse Nqarim ka xgàràè sa ke. ²Wèéa ta ga ko kǎí chìbian kúú khama. Ncēe c'èem kò cúí chìbi ga kúú tama èem ko kg'uis gúús koe nem tchànóm khòè me e, kgoana ko a gam ðim tc'árom wèè ba kòre ba.

³Bìian kg'ám-q'oo koe ta ko tóm sa tcǎà, nxǎasega i gha komsana ta a ka. Ncēeta hēéan ka ta ko wèè tc'ároan gaan di ga tchàno-tchano.

⁴Bóò skepe zi gataga, gatà zi ma kaia igaba, a ko kaia tc'áán ka qōòkaguè, igaba zi ko kaisase cg'árém hìim tchàno-tchano ðim cgoa nqàriè, a nqàri-k'g'aom ko tc'èem xòèm za qōò.

⁵Gatà iim dàòm kam tǎm ba cg'árém gúú me e, igabam ko kaia zi gúú zi ka koase.

Tc'èe naka bóò, kais hìi-k'g'ai sa ko cg'árém c'èem ka dàòè sa.

⁶Tǎm igabam c'ee me e, a cg'ǎès ðim nqōó me e. Ncēea me ko ma tséé ga a, gatà cg'áé-q'oo koe, a ba a ko wèém tc'árom khòèan di ba cg'ǎè-cg'ǎè. C'ees koem ko wèès kg'òès khòèm di sa tcǎà, a ba a ko chòò tamas c'ees dxǎwam dis ka tcǎà-dòmme.

⁷Khòè ta gha kgoana a xгаа-xгаа wèém kg'oo-coa-qhàò ba hēé, naka tsaràn hēé, naka ncǎà cgoa ko qōòan hēé, naka tshàn q'oo di gúúan hēéthéé e khama, a ta a gataga xгаа-xгаа ana. ⁸Igaba i cúí khòè ga kgoana naka tǎm ba xгаа-xгаа hǎa tite, sǎa tamam cg'ǎè ba, cg'òoko gúúan ka cg'òèa hǎa ba. ⁹Gaam cgoa ta ko X'aigam **Nqarim** Xòò ba dqòm, a ta a ko gaam cgoa Nqarim dis iis koe kúúèa ne khòè ne cgúí. ¹⁰Dqòmkuan hēé naka cgúíkuan hēéthééa ko cúís kg'áms koe tcg'oa. Tíí qōe ga tuè, ncēe sa méés tǎá gatà ii guu. ¹¹A tsàum koe i ga kǎre tshàn hēé naka tsǎu tshàn hēéthéé cúí x'ǎè ka tcg'oa? ¹²Tíí qōe ga tuè, a faia dis hìi sa ga olife di tc'ároan kúú, kana sa ga chòò-k'g'om dis hìi sa faia di tc'ároan kúú? Tsǎu tshàa ne cuiskaga kǎre tshàn kúúá hǎa tite.

Cám tsara dàò tsara tc'ëean di tsara

¹³Dìi ba tc'ëega baa, a ba a ko kóma q'ãa gatu xg'aeku koe? Gam di kg'õèan qãe ka méém x'ái, gam di tséa ne ko cg'aré-cg'aresean cgoa kúrùe sa, tc'ëean cgoa hëéthëe e. ¹⁴Igaba tu kò gatu di tcáóan koe xgòam tau ba hëe naka cëean hëéthëe úúa ne táá koase guu, naka táá tseguan tshúù-ntcòakagu guu. ¹⁵Gatà ii tc'ëea nea nqarikg'ai koe guu tama, igaba i nqòomkg'ai di i, a khòem di i, a dxāwam di i. ¹⁶Eë tauan hëe naka cëean hëéthëe hàna qgái koe, i gha kómku taman hãa khama, naka wèe cg'àè-qhàòan kúrúan hëéthëe e. ¹⁷Igaba i nqarikg'ai koe guua tc'ëean tc'àà dis ka q'ano o, a cam dis ka gataga tòókuan úúa, c'ëe ne khòe ne ka i ko tc'ëe, a i a komsanan koe hëe naka tc'ëea kabian koe hëéthëe kgoarasea hãa, a cgómkuan ka cg'oèa hãa, a i a ko qãe zi tsée zi di tc'òoan máà ta a, a i a khòe ne tákase qgóó tama, a i a kgoarasease ko qgóóse. ¹⁸Tòókuan di ne khòe ne ncëe ko tòókuan di cgùrian xhàrà ne gha tchànoan tcuù.

Dtcòm-kg'ao ba hëe naka nqóó ba hëéthëe e (4:1–5:6)

Nqóó ba ncàm guu

4 ¹Dùú sa ko ncóoan ghùì, si ko dùú sa x'àakuan ghùì gatu xg'aeku koe? A gatu ko tc'ëe zi gúù zi tama zia, ncëe ko gatu di tc'ároan koe ncóoan ghùì zi? ²Ncóó tu ko, igaba tu úú tama. Cg'òo tu ko, a tu a ko kaisase xaù, igaba tu kgoana naka hòd tite. X'àà tu ko, a tu a ko ncóoan ghùì. Gúù tu úú tama, Nqari ba tu dtcàrà tama domka. ³Dtcàrà tu ko, igaba tu hòd tama, tchàno tamase tu ko dtcàrà khama, èe tu ko hòd gúùan tu gha nxāasega èe tu ko ma gatu tc'ëe khama ma tséekagu ka. ⁴Cg'árà-kg'ao tuè! A c'úúa tua, nqóóm cgoa ncàmkuua ne Nqarim cgoa hòreku si i sa? Nxāaska, ncëe nqóóm di tsi ncàm-khoe tsi kò ii ne tsi Nqarim di tsi cg'òo-kg'ao tsi i. ⁵**Nqarim dis** Tcgāya sa ko máá: “Tc'ëem ncëem Nqarim gatá koe tòóa hãa ba kaisa zi tc'ëe zi ka cg'oèa hãa,” témé. Ncëe kg'ui ne tseegu u, ná? ⁶Igabam ko **Nqari ba** kaisa cgómkuan máà **ta a**. Gaa domkas ko **Nqarim dis Tcgāya sa** ncëeta méé:

“Nqari ba ko èe tcomsea ne ntcoe,
igabam ko èe ko cg'aré-cg'arese ne cgómkuan máà,”
témé.

⁷Ke tu ncëeska Nqarim koe máàse. Dxāwa ba xguì, nakam gha gatu koe guu ná qgóé. ⁸Nqarim koe cúù-cuuse, nakam gha Gam igaba gatu koe cúù-cuuse. Xg'aà tshàua tu, gatu chìbi-kg'ao tuè, naka tu gatu khòe tu cam tc'ëe tu, tcáóa tu q'ano-q'ano. ⁹Tshúù-tcao méé tu, naka kg'ae, naka ntcāà tcgái-tshàra. Gatu di kg'ãèan méé i kabise naka kg'ae ii, naka i gatu di qãe-tcaoan kabise naka tshúù-tcao sa ii. ¹⁰X'aigam **Nqarim** cookg'ai koe méé tu cg'aré-cg'arese nakam gha nxāasega kaikagu tu u.

Tsáá ka c'êe ba xgàra guu

¹¹Táá méé tu gatu ka c'êe ne cgoa cg'ãèse kg'ui guu, tíí qōe ga tuè. Gaam êe ko qōesem cgoa cg'ãèse kg'ui ba kana ko qōese ba xgàra, ba ko x'áèan cgoa cg'ãèse kg'ui, a ko x'áèan xgàra. X'áèan tsi ko xgàra ne tsi gaa x'áèan di tsi tséékagu-kg'ao tsi tama tsi i, igaba tsi x'áèan di tsi xgàra-kg'ao tsi i. ¹²X'áèan hēé naka xgàrakuan hēéthēé dim tcg'òó-kg'ao ba cúí Me e, Gaam êe ko kgoara, a ko kobe di qarian úúa ba. Igaba tsi tsáá díí tsia, ncēe tsáá ka c'êe ba ko xgàra tsi?

Táá koase guu

¹³Hàà tu ncēeska, gatu êe ko máá: “Ncēe cáím ka kana q'uu ka ta gha ncēeta iim x'áé-dxoom koe qōò, a síí gaa koe kuri ba x'áè, a gaa koe síí x'ámágu, a gha nxāasega marian hòò,” témé tu. ¹⁴Igaba tu q'uu ka dim cáím ka i gha gatu di kg'òèan nta ii sa c'úúa hāa. Nqōara-nqāuan khama tu ii khama, ncēe ko xòm x'aè-coa sēe a hāa a, a i a gaia kaà. ¹⁵Khama tu ga ko ncēeta mééa: “X'aigam *Nqarim* kò tc'êe ne ta gha kg'òè, a ta a ncēe sa kana êe sa kúrú,” témé. ¹⁶Ncēe i ii khama, tu ko koase a ko dqòmse. Eēta ii dqòmsean wēé ga cg'ãè e. ¹⁷Gaa domkam wēém khóèm êe qāè gúùn kúrú q'ana, igaba kúrú u tama ba, nxāa ba chibiga me e.

Qguùà khóèan dqàèa ne

5 ¹Hàà tu ncēeska, gatu khóè tu êe qguùà tu, kg'ae méé tu naka xoò, cg'ãè zi ncēe ko hàà cgae tu u zi domka. ²Gatu di qguùà ne ts'óóa hāa, i gatu di qgáían tcg'ãàn ka tc'òóèa hāa. ³Gatu di gautan hēé naka seleferan hēéthēéa ncàbà hāa, i gha gaan di ncàbàn gatu koe x'áf sa ii, a i a gha c'ees khama ma gatu di cgàan tc'óóa xgāá. Gatu di x'aian tu tòóa máásea hāa, còò di xu cáím xu u igaba. ⁴Bòò, surutan gatu di tséé-kg'aoan di i, ncēe gatu di xháràn koe kò tséé e, ncēe tu kò táá suruta a, nxāa nea kg'aea tcg'òóa hāa, i kg'ae-q'ooan êe kòo gaa xháràn khóá ne di X'aigam *Nqarim* qarim wēém tcee-dòm koe tcana hāa. ⁵Nqóómkg'ai koe tu karean koe hēé, naka qāè-tcaoan koe hēéthēé x'áèa. Tsáúkagua tu hāa tcáóa tu, **a tu a gha ghòèan ko ma cg'òòè khama ma xgàraè**, cg'òokus dim cáím ka. ⁶Tchàno khóèan tu ko chibi-chibi a xgàra, a cg'òo, gatu cgoa ne kò ntcoeku tama igaba.

Tááka zi x'áè-kg'am zi (5:7-20)

Qáo tcáóa ne

⁷Gaa domka méé tu qáo tcáo ii, tíí qōe ga tuè, naka i nxāakg'aiga X'aigam di hàà-q'ooan síí tcāà. Bòò, xhàrà-kg'ao ba ko góm ba qāà me xhàrà di tc'òoan tcg'òó. Qáo tcáo cgoa am ko, i nxāakg'aiga síí tc'áà di

túúan hēé naka kháóka di túúan hēéthēé tuu. ⁸Gatu igaba méé tu qád tcáo ii. Qari méé tu ii tcáoá tu koe, X'aigam **Nqarim** di hàà-q'ooa ne cúù u ke. ⁹Tíí qōe ga tuè, gatu ka c'ēea ne cgoa méé tu táá káise kg'ui-kg'uise guu, naka tua gha nxāasega táá xgàràè. Bòd, Xgàrà-kg'ao ba nquu-kg'ám koe hāa!

¹⁰Tíí qōe ga tuè, tc'ēe-tc'ēese porofiti xu ncēe kò X'aigam **Nqarim** cg'òè ka kg'ui xu. Sere-seres iise sèè xu, qád tcáo xu khòè xu u kò ii di sa, ēe xu kòo xgàrase ka. ¹¹Bòd, ts'ee-ts'eekg'aièa xu, ta ta ko ma tcii xu, ēe kò **xgàrakuan di x'aè ka** qarika tééa hāa xu. Jobem di qarika tééa máásean ka tu kómá, a tu a kò X'aigam **Nqari** ba còo dis ka dùú sa kúrúá sa bòd. X'aigam **Nqari** ba thòd-xama-máákuan hēé naka cgòmkuu hēéthēé ka cg'òèa hāa khama.

¹²Igaba wèé zi gúú zi tc'amkg'ai koe, tíí qōe ga tuè, nqarikg'aian cgoa igaba kana nqòómkg'ai cgoa igaba, kana c'ēe gaisean cgoa ga igaba táá gaise guu. Igaba méés gatu dis 'èè' sa, 'èè' sa ii, nakas gatu dis 'ēe-ēe' sa, 'ēe-ēe' sa ii, naka tua gha nxāasega táá xgàrasean koe tcāa guu.

Dtcòmān di còrèa ne

¹³Gatu xg'aeku koem kò c'ēe ba qómān q'oo koe hàna ne méém còrè. A ncèè c'ēem kò qāè-tcaoa hāa ne méém dqòmān di ciian nxāè. ¹⁴A ncèè c'ēem kòo gatu xg'aeku koe tsāa ne méém kaia xu kerekes di xu tcii, naka xu còrèa máá me, naka nxúian cgoa tcgáú me, X'aigam **Nqarim** dim cg'òèm koe, ¹⁵naka i gha dtcòmān di còrèan tsāakom khòè ba kg'òèkagu, nakam gha X'aiga ba ghùì me, a ncèè chìbia nem kò kúrúá hāa nem gha qgóóa mááè e. ¹⁶Ke tu nxāaska biríku gatu di chìbia ne, naka còrèa mááku, naka tua gha nxāasega kg'òèkaguè. Tchànóm khòèm di còrèa ne kaisa qarian úúa, **Nqari ba ko** gaan koe tséé khama. ¹⁷Elija ba kò kg'ama khòè me e, gatá khamaga ma, a ba a kò qarika còrè, túúan gha táá tuu ka, i kò nqòómkg'ai koe túúan táá tuu, nqoana kurian hēé naka 6 nxoean hēéthēé e. ¹⁸Me gaicara còrè, i nqarikg'aian túúan tuukagu, me kò nqòo ba kaisase tc'òoan kúrú.

¹⁹Tíí qōe ga tuè, ncèè gatu ka c'ēem kò tseeguan hòàra guua hāa, me kò c'ēe ba kabi me ne ²⁰méém q'āa, díím wèém ēe ko chìbi-kg'ao ba gam di dàoan hòàm ko koe kabi ba gha ko kgoara me, táám gha tc'ēea ba cgoa ga igaba x'lóóa xgāase ka, a ba a gha kái chìbian gam di qgóóa mááè.